

西域圖志



西域圖志



欽定皇輿西域圖志卷之四十一目錄

服物一

準噶爾部

被服之具

坐臥之具

飲食之具

日用之具

攻戰之具

成物之具



欽定皇輿西域圖志卷之四十一

服物

臣等謹按古聖王垂衣裳以治天下。制器尙象以前民用。觀繫辭所載。作網罟以下十三事。不惟制民生飲食衣服居處之宜。使之咸遂其欲。而且行旅有其資。捍患有其備。養生送死有其具。所以衛人生而周人用者。薄海以內。罔有弗暨。而外域殊方。則規制未之或及。勢限之也。且夫創物固知者所爲。而述非工巧。不能精且良。

魯縞齊紈。鄭刀宋斤。國能所擅。弗可遷也。故有此之所急。彼或不適於用。彼之所有。此或不具。其材者。五方之民。猶且衣服異宜。器械異制。況在荒陬遐裔乎。載稽周禮考工記。典絲典枲。厥有定制。攻金攻木。爰垂良法。今西域稟金行之性。氣候沍寒。人之擅長。在乎攻金與皮。其婦功不尚絲枲。而尚織罽毳。有城郭者。頗務攻木之工。而弗精造車。近和闐者。間擅磨礮之技。若夫畫繪陶旒諸事。兼之或鮮。茲者疆索遠閔。羣生

咸遂。舉其人之日用飲食。胥被

聖天子範圍曲成之澤。自今伊始。冠帶文物。制作精

良。固當駸駸乎日盛矣。顧前此樸澁之風尙存。

未宜略而弗考。爰采其服飾器用之倫。各仍本

號。用中土備物所有。擬議而審定之。至於古物

流傳。若玉盤玉圭銅噉嚙芻之屬。舊號彼中珍

異。當掃穴開屯之後。均得驛致

明廷。詳求端委。偕兌和而列序。苟

宸翰以增輝。藉仰我

皇上日新永保。不貴異物之至意。非僅如曩代獲休屠金人。漫侈遠略者。所可比倫萬一也。因並著於編。志服物第十七。



欽定皇輿西域圖志卷之四十一

服物一

準噶爾部

被服之具。

哈爾邦。卽冠也。與內地煖帽略同。其頂高。其

邊平。以白氊爲裏。外飾以皮。貧者無皮飾。氊或  
染紫綠色。無冬夏之別。但以毛質厚薄爲差。上  
綴纓名札拉。止及其帽之半。婦人冠與男子同。  
辮髮雙垂。約髮用紅帛。在辮之腰。帛間綴以好

珠瑟瑟之屬。望若繁星。

拉布錫克。卽袍也。台吉用錦緞爲之。上飾以繡。宰桑則絲繡。絲紵氍毹爲之。賤者多用綠色及雜色。禦冬則以駝毛爲絮。名庫綳。亦有止衣羊皮者。右衽。袖平不鑲。四圍皆連紉。台吉宰桑之婦。衣用錦繡。兩袖兩肩。及交襟續維。鑲以金花。或以刺繡。民人婦女襟袖衣衽。俱用染色皮鑲之。

固都遜。卽鞞也。以牛皮爲之。台吉多用紅香

牛皮中嵌鹿皮。刺以文繡。宰桑亦用紅牛皮。不嵌鹿皮。不刺繡。民人穿皮履。或黑或黃。無敢用紅者。婦人鞞履與男子同。

布色。卽帶也。以絲爲之。端垂流蘇。其長委地。或以全幅帛爲之。端長尺餘。

哈卜塔噶。卽荷包也。緞布爲之。制與內地微異。結穗精美。

綏克。卽環也。金銀爲之。以墜耳飾。以珠。男婦皆用之。

〔北史高車傳〕婦人以皮裹羊骸。戴之首上。縈屈髮鬢而綴之。有似軒冕。〔西域傳〕西突厥居烏孫故地。身衣裘褐。悅般國。翦髮齊眉。以飴餈塗之。昱昱然光澤。

〔唐書回鶻傳〕回鶻汗妻可敦。服絳。通裾大襦。冠金冠。前後銳。堅昆國。服貴貂狔。阿熱冬帽貂。夏帽金釵。銳頂而卷末。諸下皆帽白氊。喜佩刀礪。賤者衣皮不帽。女衣毳毼錦罽綾。

〔文獻通考〕回紇國可汗相見。去帽被髮以爲禮。

婦人總髮爲髻。高五六寸。以紅絲絹囊之。旣嫁則加紈帽。

按準部服飾。史傳所紀殊略。以今證古。大致相同。乾隆十九年。封都爾伯特台吉策凌等爵。首

賜冠服。迄蕩平而後。革心向化之侶。被服均同內地。於是笑擅裘之喬野。慚卉服之蠢愚。苟非幸際休嘉。孰能得此殊榮異數乎。

坐臥之具。

繅和什勒。以木爲之。長六七尺。濶三尺許。高尺餘。有四足。制如內地之床。其左右及後三面。咸有邊闌。或加雕刻。惟大台吉坐之。宰桑以下不僭坐。故稱台吉龔位爲坐床云。

西勒圖。制同繅和什勒。掌教喇嘛坐之。

錫爾德克。以羊毛織成。其形長方。或鋪於床。或鋪於地。施坐褥於上。卽內地氍毹也。

都爾布錦。亦以羊毛織成。其形方正。大者二尺。小者尺餘。加於錫爾德克之上。制如內地坐

褥。

德爾。卽枕也。其形長方。內著棉絮之屬。外蒙以布。或緞。首與足皆有之。首枕稍高。足枕稍卑。琨濟勒。卽被也。以緞及布爲之。中著棉絮殊厚。

德必斯克爾。卽臥褥也。以氈爲裏。或一層。或兩層。冒以緞綢及布之屬。用以臥。被有絮而褥無絮。不產木棉。以駝毛代之。

庫什格。其形如幔。施於座前。面分兩幅。而中

開之。或以布。或以氊。隨時寒燠以張之。其貴官則有兼用緞者。流蘇銀鉤之屬。綴於其上。

博克綽。以皮爲包。用盛衣服。

格爾。卽蒙古包也。稱房屋亦云。

唐書回鶻傳。堅昆國。阿熱駐牙青山。周柵代垣。聯氊爲帳。號密的支。宅首領居小帳。

北史突厥傳。西突厥。其俗穹廬氊帳。牙帳東開。蓋敬日之所出也。

按今準噶爾部方位之名。以東爲南。以南爲



西。西爲北。北爲東。彼處戶皆東向。卽內地之南向。北史謂西突厥牙帳東開。卽南向之謂。今準噶爾所居。戶皆東向。猶存西突厥之遺意也。

飲食之具。

阿雅噶。屈柳木及樺木爲之。大小不等。制同栳椀。

塔巴克。形同內地之盤。盛食及羹。以紅銅爲之。亦有用木者。深淺大小不等。其貴重之盤。則